



## CONVENIO DE COLABORACIÓN ENTRE A CONSELLERÍA DE FACENDA, A AXENCIA TRIBUTARIA DE GALICIA E A FEDERACIÓN GALEGA DE MUNICIPIOS E PROVINCIAS AO ABEIRO DO PROCEDEMENTO DE REGULARIZACIÓN CATASTRAL

En Santiago de Compostela, 23 de maio do 2016

### REUNIDOS

Dunha parte, o Sr. D. Valeriano Martínez García, na súa condición de Conselleiro de Facenda e de Presidente da Axencia Tributaria de Galicia, en virtude das facultades que lle conceden as normas xurídicas que regulan o exercicio do seu cargo, e sinaladamente o artigo 34 da Lei 1/1983, de 22 de febreiro, da Xunta de Galicia e do seu Presidente, e o artigo 14 do Decreto 202/2012, de 18 de outubro, polo que se crea a Axencia Tributaria de Galicia e se aproba o seu estatuto.

E doutra, D. Alfredo L. García Rodríguez na súa condición de Presidente da Federación Galega de Municipios e Provincias, en nome e representación da mesma, no exercicio das competencias atribuídas no artigo 44 e 46.1 b) dos seus Estatutos.

Recoñécense mutua e reciprocamente ambas as dúas partes a capacidade legal necesaria para formalizar o presente Convenio, a cuxo efecto

### EXPOÑEN

I

Corresponde á Consellería de Facenda o exercicio das competencias en materia de tutela financeira dos Entes Locais, atribuída á Comunidade Autónoma de Galicia no artigo 49.1 do seu Estatuto de Autonomía. E, corresponde á Axencia Tributaria de Galicia (en adiante ATRIGA) a colaboración especialmente coas administracións tributarias da Administración local, segundo o previsto no artigo 8.3 do Decreto 202/2012, de 18 de outubro, polo que se crea a Axencia Tributaria de Galicia e se aproba o seu estatuto.

A Federación Galega de Municipios e Provincias (en diante FEGAMP) é unha Asociación constituída polos Entes Locais que voluntariamente o decidan, gozando de personalidade xurídica plena e pública para o desenvolvemento que lle son inherentes, gozando de plena capacidade para subscribir convenios e contraer compromisos ou obrigas, figurando entre os seus fins a representación e defensa das Entidades Locais, a promoción das competencias locais e calquera outro que afecte ou incida directa o indirectamente nos seus asociados.

Os Municipios son entidades básicas da organización territorial do Estado e cauce inmediato de participación cidadán nos asuntos públicos, que institucionalizan e xestionan con autonomía os intereses propios das correspondentes colectividade. E as Provincias son entidades locais con personalidade xurídica propia, que gozan de autonomía para xestionar os intereses propios das correspondentes colectividade.

## II

O estado español, dentro das competencias que lle son propias, ven desenvolvendo no período 2013-2016 un procedemento de regularización catastral coa finalidade de incorporar ao Catastro Inmobiliario os bens inmoebles urbanos e rústicos con construción, así como as alteracións das súas características, para garantir a adecuada concordancia da inscrición catastral dos devanditos bens coa realidade dos mesmos.

É innegable que este tipo de procedementos presentan un marcado carácter técnico que, en ocasións, fai que a súa razón de ser, alcance e consecuencias escape do coñecemento do cidadán medio que necesita, por eses motivos, de asesoramento para valorar e comprender os devanditos procedementos e, no seu caso, efectuar as alegacións a que haxa lugar.

Por outra banda, a regularización catastral pode supoñer para os concellos en cuxos termos municipais se desenvolvan un reto tanto en termos de atención e asistencia aos seus veciños, como a nivel organizativo e de xestión interna, dadas as repercusións que do mesmo podan derivar no seu ámbito financeiro e de equilibrio orzamentario; sen descoñecer que, en ocasións, esta regularización pode carretar para os entes locais a conveniencia de adecuar as súas ordenanzas fiscais no que atinxe as súas competencias normativas para dar un adecuado encaixe á nova realidade catastral resultante dos devanditos procedementos.

Por estes motivos, o Pleno do Parlamento de Galicia, en sesión de data 16 de marzo de 2016, aprobou unha proposición non de lei en cuxo punto terceiro instábase á Xunta de Galicia a establecer fórmulas de colaboración a través da FEGAMP para prestarlle o asesoramento preciso aos concellos de Galicia que os soliciten en



relación coas súas competencias normativas no imposto sobre bens inmobles e as repercusións que estas podan ter no seu ámbito financeiro e de equilibrio orzamentario.

### III

Atendendo ao exposto ata agora, e no marco de colaboración mutua que debe presidir as relacións entre as Administracións Públicas e segundo o principio establecido no artigo 4.1.c) da Lei 30/1992, do 26 de novembro, de Réxime Xurídico das Administracións Públicas e do Procedemento Administrativo Común, tanto a Consellería de Facenda, a ATRIGA como a FEGAMP consideran que sería moi beneficioso para o cumprimento dos seus respectivos fins o establecemento dun sistema de colaboración que permita asistir aos concellos no exercicio das súas competencias normativas no imposto sobre bens inmobles para así garantir os principios de legalidade, eficacia, eficiencia e responsabilidade na xestión tributaria; establecendo ao mesmo tempo un reforzo a obriga de prestar asistencia aos veciños por parte das entidades locais, coma administracións máis próximas ao cidadán.

### IV

Polo exposto, ambas as dúas partes acordan celebrar o presente Convenio de Colaboración que se rexerá polas seguintes

## CLÁUSULAS

### PRIMEIRA.- Obxecto e finalidade do Convenio

O presente Convenio ten por obxecto establecer un marco xeral de colaboración entre a Consellería de Facenda, a Axencia Tributaria de Galicia e as Entidades Locais de Galicia asociadas á FEGAMP que se adhiran ao presente convenio, polo que se preste un servizo de asesoramento aos devanditos concellos, que así o soliciten, respecto do exercicio das súas competencias normativas en relación ao imposto sobre bens inmobles e a súa repercusión no ámbito financeiro e equilibrio orzamentario dos mesmos; implementando á súa vez un reforzo das garantías do axeitado desenvolvemento do procedemento de regularización catastral do que están a ser obxecto os inmobles radicados en diversos concellos galegos.



## SEGUNDA.- Obrigas derivadas do presente convenio

O presente convenio obriga ás partes asinantes e ás entidades locais que se adhiran ao mesmo a prestarse a máxima colaboración para lograr o mellor logro dos fins perseguidos.

En particular, a Axencia Tributaria de Galicia comprométese a prestar asesoramento en materia tributaria aos Concellos que se poidan adherir a este convenio no relativo ao exercicio polas corporacións locais das competencias que legalmente teñen recoñecidas no imposto sobre bens inmobles e, a Consellería de Facenda, a comprobar a súa incidencia na estabilidade orzamentaria e a sustentabilidade financeira.

Así dependente da Área de colaboración social, información e asistencia na ATRIGA, existirá unha unidade que, unha vez que a Entidade local subscriba a cláusula de adhesión do Anexo I, porase en contacto co interlocutor que esta designe iniciándose o asesoramento en función do grado de desenvolvemento do proceso de regularización catastral no que se atope o Concello.

Unha vez que o devandito Concello informe sobre este extremo, o asesoramento centrarase nos seguintes aspectos:

- Se o proceso aínda non se iniciara, daráselles información xeral sobre o procedemento de regularización catastral 2013-2016.
- Se xa estivese en curso, asesorarase ao Concello dos dereitos e obrigas dos veciños para dar efectividade aos compromisos asumidos polas entidades locais neste Convenio.
- Se estivese concluído, o asesoramento desenvolverase no relativo ao exercicio polas corporacións locais das competencias que legalmente teñen recoñecidas no imposto sobre bens inmobles e os seus efectos, así como na análise do cumprimento das regras fiscais a que fai referencia a lei orgánica 2/2012, do 27 de abril, de estabilidade orzamentaria e sustentabilidade financeira e demais normativa de aplicación.

Pola súa banda A FEGAMP obrígase a:

- Trasladar ás Entidade Locais o presente convenio e promover a súa adhesión ao mesmo. Neste sentido, a FEGAMP difundirá entre as entidades locais galegas por escrito as características desta actuación, o texto do convenio e o marco de colaboración que del se deriva, así como o procedemento e tramitación precisa para a súa adhesión, promovendo esta.
- Levar a cabo as labores de intermediación entre as partes cando lle sexa solicitado e dentro dos seus fins.



Por último os concellos adheridos comprométense a :

- Informar á ATRIGA, a través do interlocutor designado ao efecto, do grado de desenvolvemento do proceso de regularización catastral no que se atope no prazo máximo dun mes dende a recepción da cláusula de adhesión pola devandita Axencia.
- Prestar aos seus veciños a axuda e información precisa para un mellor entendemento da natureza, finalidade, tramitación e repercusións do procedemento de regularización catastral sinalado no expositivo do presente convenio.
- Proporcionar os datos necesarios relativos ao IBI e a información económica que obren no seu poder e requiridos pola unidade designada ao efecto para o correcto cumprimento das obrigas derivadas do presente Convenio .

### **TERCERA. - Obriga de sixilo**

As autoridades, funcionarios e o resto de persoal que teñan coñecemento dos datos ou información subministrados por causa deste Convenio estarán obrigados a máis estrita e completa observancia do deber de sixilo respecto deles. A violación desta obriga implicará incorrer nas responsabilidades penais, administrativas e civís que resulten procedentes.

### **CUARTA. - Efectos da subministración de información**

A subministración de información realizada ao abeiro deste Convenio non terá outros efectos que os derivados do obxecto e a finalidade para a que os datos foron subministrados.

### **QUINTA. - Organización para a execución do Convenio**

Co fin de concretar calquera aspecto relacionado co procedemento de subministración de información establecida por este Convenio que precise de desenvolvemento, de coordinar as actividades necesarias para a execución do presente Convenio, así como para levar a cabo a súa supervisión e control, crearase unha Comisión Mixta de Coordinación e Seguimento composta por dous representantes nomeados polo Conselleiro de Facenda e outros dous nomeados polo Presidente da FEGAMP. En calidade de asesores, con dereito a voz, poderán incorporarse calquera outros funcionarios que se considere necesario.

A Comisión reunirse a instancia de calquera das partes e, en todo caso, ao remate da vixencia do convenio para examinar os resultados e incidencias da colaboración realizada.



A Comisión Mixta de Coordinación e Seguimento rexeráse en canto ao seu funcionamento e réxime xurídico, respecto ao non establecido expresamente na presente Cláusula, pola normativa específica en vigor.

#### **SEXTA. - Resultados da aplicación do Convenio**

Para avaliar a eficacia do presente Convenio, a Consellería de Facenda, a Axencia Tributaria de Galicia e a FEGAMP comprométese, ao remate da súa vixencia, a determinar os resultados derivados da colaboración que se efectúe ao abeiro do disposto neste Convenio, que serán analizados conxuntamente no seo da Comisión Mixta de Coordinación e Seguimento.

#### **SÉTIMA.- Procedemento de adhesión**

Tras a sinatura do presente convenio entre a Consellería de Facenda, a Axencia Tributaria de Galicia e a FEGAMP, todas as Entidades Locais de Galicia asociadas á FEGAMP que o desexen poderán adherirse ao mesmo. Para elo, formalizarán a Cláusula de Adhesión que se achega como ANEXO I a este convenio ante a Dirección da Axencia Tributaria de Galicia. A ATRIGA remitirá copia das Cláusulas de Adhesión á FEGAMP e a Consellería de Facenda.

As devanditas adhesións serán inscritas no Rexistro de Convenios da Xunta de Galicia regulado no Decreto 126/2006, de 20 de xullo, e será obxecto de publicidade nos termos do artigo 15 da Lei 1/2016, de 18 de xaneiro, de transparencia e bo goberno de Galicia.

#### **OITAVA.- Prazo de vixencia**

O presente Convenio terá vixencia dende a data da súa sinatura ata o 31 de decembro do 2017. Porén, se chegada dita data non rematara o procedemento de regularización catastral sinalado no expositivo deste convenio, o mesmo poderá prorrogarse mediante a subscripción dunha addenda cun mes de antelación á finalización do devandito prazo de vixencia.

#### **NOVENA. – Financiamento**

As actuacións previstas no presente Convenio, en canto supoñen a contratación de entre dous a cinco funcionarios postos base, subgrupo A2, variable segundo o número de Concellos que se adhiran ao mesmo, xerará un gasto, en cómputo anual, entre 65.794,00€ e 164.484,98€, respectivamente, que se realizará con cargo ás partidas orzamentarias da ATRIGA 06.A2.621A.120.24 e 06.A2.621A.160.24.

## DÉCIMA. - Natureza administrativa

O presente Convenio de colaboración é de carácter administrativo, considerándose excluído do ámbito do Real Decreto Lexislativo 3/2011, de 14 de novembro, polo que se aproba o Texto Refundido da Lei de Contratos do Sector Público en virtude do art. 4.1 c) do mesmo. As controversias sobre a interpretación e execución deste poderán ser resoltas pola Comisión Mixta de Coordinación e Seguimento prevista no presente convenio.

As cuestións litixiosas que poidan xurdir na súa interpretación e cumprimento serán de coñecemento e competencia da orde xurisdiccional do contencioso- administrativo.

Segundo o disposto na Disposición Adicional 2ª da Lei 1/2016, de 18 de xaneiro, de transparencia e bo goberno de Galicia, o presente convenio require autorización previa do Consello da Xunta de Galicia.

Este convenio será inscrito no Rexistro de Convenios da Xunta de Galicia regulado no Decreto 126/2006, de 20 de xullo, e será obxecto de publicidade nos termos do artigo 15 da Lei 1/2016, de 18 de xaneiro, de transparencia e bo goberno de Galicia.

En proba de conformidade, ambas as dúas partes asínano por triplicado a un só efecto na data e lugar indicados no encabezamento.

POLA CONSELLERÍA DE FACENDA  
E POLA AXENCIA TRIBUTARIA DE  
GALICIA

POLA FEDERACIÓN GALEGA DE  
MUNICIPIOS E PROVINCIAS



Valeriano Martínez García



Alfredo L. García Rodríguez  
FEDERACIÓN GALEGA DE MUNICIPIOS E PROVINCIAS  
Presidencia

## ANEXO I

### CLAUSULA DE ADHESIÓN

D. (nome e cargo) en representación de (Entidade Local),

#### DECLARA:

Que o (órgano competente) da (Entidade Local) acordou, con data \_\_\_\_\_ solicitar a adhesión ao Convenio subscrito o \_\_\_\_\_ entre a Consellería de Facenda, a Axencia Tributaria de Galicia e a Federación Galega de Municipios e Provincias para a asistencia no exercicio de competencias relativas ao procedemento de regulación catastral en data .....

#### MANIFIESTA:

A vontade da (Entidade Local), cuxa representación ostenta, de adherirse expresamente a todas e cada unha das cláusulas do Convenio antes citado, asumindo as obrigas derivadas do mesmo e con suxeición a todas e cada unha das súas cláusulas.

Que a estes efectos achégase a seguinte documentación:

- Certificación do Secretario/a da corporación local acreditativa do nomeamento do asinante no cargo, a súa vixencia e a súa representación da entidade local.
- Certificación do acordo do órgano municipal competente pola que se efectúa a adhesión ao dito convenio.

Que se designa como interlocutor a.....

(Lugar e data)